

grans missions se il veult auoir honneur et victoire. Car salomon dit. Qui plus a de richesses plus a de despens. Apres ce treschier sire iacoit ce que par voz richesses moult de gēs vo^s puissies auoir. Toutefuoyes pource ne vous cōuiēt pas cōmēcier guerre la ou vous pouez aultremēt auoir paix a vostre hōneur. Car la victoire des batailles de ce monde ne gist pas ou grāt nombre de gens mais en la main et en la voulēte de dieu. Et pource iudas macabeus qui estoit cheualier de dieu quāt il se deut cōbatre cōtre son aduersaire qui hauoit plus grāt nombre de gēs que luy il reconforta sa petite compaignie et dist. Aussi le gieremēt dist il peult dōner dieu victoire a petit de gēs cōme a moult de gens. Car la victoire des batailles ne viēt pas du grāt nombre de gēs mais viēt du ciel. Et pource treschier sire q̄ nul hōme nest certā se il est digne que dieu luy dōint victoire ne sil est digne de lamour de dieu selon ce que dit salomon pour ce vngchascun doit auoir grāt paour de guerre commēcier. Et pource que es batailles a moult de perilz et aduiēt aulcunefoys que aussi tost occit on le grāt cōme le petit. Car selon ce quil est escript ou secōd liure des roys les fais des batailles sont aduētueux et ne sont pas certains assez legieremēt fiert le glaive maintenāt lung maintenāt lautre. Et pource que perilz y a tout sage hōme doit fuyr guerre. Car salomon dit. Qui ayme le peril il chera ou peril.

Apres ce que dame prudence eut parle melibee respondit. Dame par voz belles paroles et pour les raysons que vous mettes auāt que la guerre ne vous plaīt point ie suis contēt de la delaisier. mais ie nay pas encores ouy vostre cōseil cōme ie me doy porter en ceste besoigne. Certes dist elle ie vous conseille que vous acordes a voz aduersaires et que vous ayez paix a culx. Car seneque dit en ses espitres que par concorde les petites richesses deuient grādes et par discorde les grās richesses vont a declin et vous scaues que vng des souuerains grās biens de ce monde si est paix. Et pource dit Iesucrist a ses apostres. Biē eureux dit il sont ceulx qui aymēt et pourchacent paix car ilz sont appelez enfans de dieu. De dit melibee or voy ie biē que vous naines pas mō honneur vous scaues que mes aduersaires ont cōmēcie le debat et vees quilz ne requierēt point la paix. voules vo^s doncques que me voise humilier et crier mercy. certes ce ne seroit pas mō hōneur. car trop grāt familiarite engendre mesprisemēt. Lors dame prudēce fist semblāt destre couroucie et dist. certes sire salue vostre grace iayme vostre honneur cōme le miē et vous ne aultre ne veistes oncqs le cōtraire. Et se ie vo^s ay dit q̄ vous deues